

共同經課-1 撒母耳記上三章一節～十節、十一節～二十節

1 Gín-ná 撒母耳 ti Í-lī ê 面前服事耶和華。當 hiah-ê 日，耶和華 ê 話真稀罕，無常常有啟示。2 一日 Í-lī 睏 tī 家己 ê 所在，伊 ê 目睷已經 bû，看 boē 明。3 上帝 ê 燈 iáu 未 hoa，撒母耳已經 tī 耶和華 ê 殿，tī 上帝 ê 約櫃 hia，teh 睏。4 耶和華叫撒母耳；伊應講，我 tī-chia。5 就走到 Í-lī hia，講，我 tī-chia，因為你叫我。Í-lī 講，我無叫你，你 tò 去睏。伊就去睏。6 耶和華 koh 叫撒母耳；撒母耳起來，去 Í-lī hia，講，我 tī-chia，因為你叫我。伊應講，我 ê kiáⁿ ah，我無叫你，thang koh 去睏。7 Hit 時撒母耳 iáu 未 bat 耶和華，耶和華 ê 話未有啟示伊。8 耶和華第三 pái 叫撒母耳。撒母耳起來，去 Í-lī hia，講，我 tī-chia，因為你叫我。Í-lī chiah 知是耶和華叫 gín-ná。9 Tùi án-ni，Í-lī kā 撒母耳講，你 koh 去睏；伊若 koh 叫你，你就講，耶和華 ah，請你講，你 ê 奴僕聽。撒母耳就去睏 tī 伊 ê 所在。10 耶和華 koh 來 khiā-teh，親像前 kúi-nā pái 叫，撒母耳 ah，撒母耳 ah。撒母耳應講，請講，你 ê 奴僕 teh 聽。11 耶和華 kā 撒母耳講，看 ah，我 tī 以色列中 beh 行一項事，hō 聽見 ê 人，兩個耳孔 beh 抖(tiō)起來。12 我論 Í-lī ê 家所講 ê，到 hit 日頭到尾我 beh 應驗 tī 伊。13 我 bat kā 伊講，我 beh 為 tiòh 伊所知 ê 罪，永遠審判伊 ê 家；因為伊 ê kiáⁿ 家己招咒詛，伊也無禁止 in。14 所以我有對 Í-lī ê 家 chiū-choā 講，Í-lī ê 家 ê 罪過，雖然祭祀禮物，永遠 boē 會贖回。15 撒母耳睏到天光，就開耶和華 ê 殿門。撒母耳 m̄敢將異象 kā Í-lī 講。16 Í-lī 叫撒母耳，講，我 ê kiáⁿ 撒母耳 ah。伊應講，我 tī-chia。17 Í-lī 講，耶和華對你講甚麼？求你 m̄-thang 隱瞞 tī 我；若將伊所 kā 你講 ê 對我隱密一句，願上帝加倍責罰你。18 撒母耳就將 hiah-ê 話 lóng kā 伊講，也無對伊隱瞞。Í-lī 講，是耶和華，願伊照伊所看做好 ê 來行。19 撒母耳漸漸大漢；耶和華 kap 伊 tī-teh，hō 伊所講 ê，無一句無應驗。20 Tùi Tàn 到別士巴，所有 ê 以色列人 lóng 知撒母耳設立做耶和華 ê 先知。

共同經課-2 詩篇三九篇一節～六節、十三節～十八節

1 耶和華 ah，你已經鑑察我，bat 我。2 我坐落去，我 peh 起來，你 lóng 知；你 tùi 遠遠知我 ê 念頭。3 我行路，我倒 tī 眠床，你 lóng 詳細知；我一切所行 ê，你也深知。4 耶和華 ah，我 ê 嘴所講 ê 話，你無一句 m̄知。5 你 tī 我 ê 前後圍我，按手 tī 我 ê 頂面。6 Chit 款 ê 知識奇妙，我 boē 能測度；真高，我 boē 能到。13 因為我 ê 臟腑，是你所創造 ê；我 tī 老母 ê 腹肚內，你有庇佑我。14 我 beh 感謝你，因為我受造奇妙 thang 驚；你 ê 所做奇妙；這是我 ê 心深知 ê。15 我 tī 暗中受造，Tī 地 ê 真底受連絡，Hit 時我 ê 形體無隱瞞 tī 你。16 我 bē 成形 ê 體質，你 ê 目睷已經看見，所定 tiòh ê 日，iáu 未有一日，Lóng 記 tī 你 ê 冊。17 上帝 ah，你 ê 意思對 tī 我，到 chiah 寶貝！Hit-ê 數額，到 chiah choē！18 我若 beh 算伊，妣海沙 khah-choē；我睏精神 ê 時，猶原 kap 你相 kap tī-teh。

共同經課-3 哥林多前書六章十二節～二十節

12 凡事我 lóng thang；但是無一盡有利益。凡事我 lóng thang，但是無一項我 beh hō 伊管。13 食是為 tiòh 腹肚，腹肚也是為 tiòh 食，總是 chit 兩項上帝 beh 廢伊。獨獨身軀 m̄是為 tiòh 淫亂，是為 tiòh 主，主也是為 tiòh 身軀。14 上帝 bat hō 主 koh 活，也 beh tùi 伊 ê 權能 hō 咱 koh 活。15 Kiám m̄知 lín ê 身軀是基督 ê 百體？我 kiám thang 將基督 ê 百體 hō 伊做娼妓 ê 百體 mah？斷斷 m̄-thang。16 á 是 lín m̄知 kap 娼妓連合 ê，是 kap 伊做一體？因為講，兩個 beh 成做一體。17 獨獨 kap 主連合 ê 是一個神。18 Tiòh 閃避淫行。人所犯 tàk 項 ê 罪 lóng 是身軀外 ê；但是行姦淫 ê 是犯罪到 tī 家己 ê 身軀。19 á 是 lín m̄知 lín ê 身軀就是聖神 ê 殿；聖神 tiàm-tī lín，就是 lín tùi 上帝所有 ê？koh lín m̄是家己 ê；20 因為是用價錢買 ê；所以 tiòh tī lín ê 身軀榮光上帝。

共同經課-4 約翰福音一章四十三節～五十一節

43 Koh 隔日，耶穌 beh 去加利利，tú-tiòh 腓力；就 kā 伊講，Tè 我。44 腓力是伯賽大 ê 人，kap 安得烈彼得同城。45 腓力 tú-tiòh 那但業，就 kā 伊講，摩西記 tī 律法 kap chiah-ê 先知所記 ê，阮已經 tú-tiòh 伊，就是約瑟 ê kiáⁿ，拿撒勒人，耶穌。46 那但業 kā 伊講，拿撒勒 kiám 會出甚麼好物 mah？腓力講，來看。47 耶穌看見那但業就近伊，就 chí 伊，講，你看，真正是以色列人，sim 無詭譎 ê。48 那但業 kā 伊講，Tùi tá-lòh bat 我？耶穌講，腓力 iáu-bē 叫你，你 tī 無花果樹腳，我已經看見你 lah。49 那但業應伊講，拉比，你就是上帝 ê kiáⁿ；你就是以色列 ê 王。50 耶穌應伊講，因為我 kā 你講，我已經看見你 tī 無花果樹腳，你就信 mah？你 beh 看見 tai-chi 比 chiah-ê khah 大 ê。51 Koh kā 伊講，我實實 kā lín 講，Lín beh 看見天開，上帝 ê 天使上落 tī 人子 ê 頂面。